

四庫全書

子部

欽定四庫全書

子部

本草乘雅半偈卷六

詳校官太醫院吏目臣周世泰

編修臣倉聖脈覆勘

總校官進士臣朱鈴

校對官中書臣吳甸華

謄錄監生臣朱紱

欽定四庫全書

本草乘雅半偈卷六

明 盧之頤 撰

本經中品五

海螵蛸

海藻

淫羊藿

青蒿

乾薑

苦參

知母

白薇

紫草

葱薑白

澤蘭葉

白鮮皮

山茱萸

赤小豆

大豆黃卷

水銀

石硫黃

白馬陰莖

牡狗陰莖

本經下品一

代赭石

戎鹽

貫衆

白芨

連翹

白斂

烏頭

附子

天雄

半夏

虎掌

常山

羌花

大黃

蚤休

鬼臼

巴豆

大戟

本經中品

海螵蛸氣味鹹微溫無毒主女子赤白漏下經汁血閉  
陰蝕腫痛寒熱癥瘕無子

覆曰近海州郡皆有九月寒鳥入水所化越小滿則  
形小矣形若革囊口在腹下八足聚生口旁無鱗有  
鬚兩鬚如帶甚長設遇風波即以鬚下矴或粘作纜  
故名纜魚能吸波噀墨令水溷黑以自衛也南越志  
云性反嗜烏每自浮水上飛鳥見之以為死而啄之

乃卷取入水而食之因名爲賊轉爲烏之賊害也故  
腹中血及膽正黑如墨可以書字但逾年則迹滅惟  
存空紙爾世言烏鰂懷墨而知禮謂之海若白事小  
吏也外皮亦黑內肉則白背上只有一骨形如樗蒲  
子而稍長兩頭尖色潔白質輕脆重重有紋宛如通  
草紋順者爲真紋橫者沙魚骨也修治以血滴作水  
浸之并煮一伏時取出掘一土坑燒通紅色入蜈蚣  
在內經宿取出其効加倍也惡白芨白欬附子能淡

鹽伏礪縮銀

參曰背骨竒而無枝節名曰鰲蛭形相似耳上表堅薄如介裏理輕脆而通蓋維持者督闔闢者任也其口以腹則其息以胎矣吸波噉墨以自衛者此即藏精起亟陽以陰為用衛轉營為衛耳主女子赤白漏下經汁者闔者闔之也血閉陰蝕腫痛寒熱癰瘕無子者闔者闔之也別錄諸家用治男子驚癇痰瘧吐血熱中瘡膿痘疹內經用治血枯得之少年時有所



大脫血或醉以入房致中氣竭肝血傷月事衰少不以時至者當病胸脇支滿妨於食病至則先聞腥臊臭出清液先唾血四肢清目眩時時前後血病名曰血枯佐以蘆茹和以雀卵飲以鮑魚汁所以利腸中及益肝血也悲屬營任之變青故相宜耳

月事衰少在女子即月事不以時下在男子即精氣不以時溢瀉矣

### 本經中品

海藻氣味苦鹹寒無毒主癭瘤結氣散頸下硬核痛癰

腫癰瘕堅氣腹中上下雷鳴下十二水腫

穀曰出東海海島有大小二種小者名馬尾藻生淺水中宛如馬尾大者名大葉藻生深水中葉大如藻海人以繩繫腰投水取之五月後不可取恐大魚傷人也修治用生烏豆紫背天葵同煮一伏時日乾用反甘草

參曰海藻生海中橫陳於水若藻濯然一名蔣海中之水藻也一名羅水草之有文也一名綸生淺水而

葉細一名組生深水而葉大爾雅云綸似綸組似組  
東海有之正謂二藻也蓋海晦也主承穢濁水黑如  
晦也藻善條暢不以晦濁礙行漾故主經絡肉理有  
失次第淺深致氣結成癭瘤及頸下硬核或氣堅成  
癥瘕癰腫及腹中上下雷鳴亦鹹以軟之堅結自釋  
矣十二經水皆止而盈海納百川止而不盈尾閭泄  
之是也

本經中品

淫羊藿氣味辛寒無毒主陰痿絕陽莖中痛利小便益氣力強志

覈曰出上郡陽山山谷江東陝西泰山漢中湖湘間皆有一根數莖莖細頗堅高二三尺一莖三桠一桠三葉長二三寸如豆藿葉如杏葉面光背淡邊有細齒薄而有刺四月開花白色亦有紫色者碎小獨頭經冬不凋根似黃連色紫多鬚即仙靈脾也景曰西川北部有獸曰淫羊與山羊無異日羣百遍蓋食此

藿所致也羊食之而淫故曰淫羊若以為川北有淫  
羊似乎曲為之解矣又名仙靈脾當是取其益氣力  
強志而名之耳修治取生處不聞水聲者乃良以夾  
刀夾去葉之四畔花枝每觔用羊脂四兩拌炒待脂  
盡為度薯蕷紫芝為之使得酒良

參曰羊性善羣淫羊功力相似藿則以形舉也莖高  
二三尺細緊勁直經冬不凋可想見其作用矣一莖  
三桠一桠三葉具異木生成之數助長厥陰之用堅

固淫業者也但不可久服以有餘於用不足於體令人無子故也

本經中品

青蒿氣味苦寒無毒主疥癩癰瘡惡瘡殺蟲治留熱在骨節間明目

覈曰生華陰川澤所在有之得春最早望春便發莖如指肥葉極纖細色並青翠似茵陳蒿而背不白至夏漸高五六尺許秋深開細淡黃花花下結子如粟

米莖柔靱根白硬苗葉花實並芬芳特勝功力亦相  
若也筆譚云青蒿一類自有二種一黃色一青色青  
者入藥即本經所指青蒿亦有所別陝西銀綏間見  
青蒿叢中時有一兩窠迥然特青如松檜翠碧可觀  
至秋餘蒿轉黃此蒿翠碧更倍古人取深青者為勝  
恐即此蒿獨得蒿力之專精者也不然諸蒿何嘗不  
青但青而色淡雷公云凡使惟中為妙到膝即仰到  
腰即俛使子勿使葉使根勿使莖四件若同使翻然

成痼疾修治其葉或莖實用七歲兒七個溺浸七日  
七夜取出晒乾用

參曰蒿青而高纖柔整密望春便發少陽膽藥發陳  
致新之宣劑也其味苦已出乎陽其氣寒未離乎陰  
陰中之陽陽中之樞象也蓋少陽膽主骨故對待骨  
節間留熱若皮膚分理間疥癢痂痒惡瘡亦屬留熱  
所致皆陳也宣發發陳陳發則新至矣主明目者以  
肝膽開竅於目不唯發陳且拂塵矣君子蒿目其斯



之謂歟

本經中品

乾薑氣味辛溫無毒主胸滿欬逆上氣溫中止血出汗  
逐風濕痺腸澼下痢生者尤良久服主臭氣通神明

覈曰出漢溫池州江西浙江諸處宜原隰沙地四月  
種種五月生苗如嫩蘆而葉稍闊兩兩相對惡濕如  
而畏日故秋熟則無薑設一莖稍微則根病矣社前  
後新芽頗長如列指狀一種可生百指皆分歧而上

即宜取出種薑否則子母俱敗秋分采芽柔嫩可口  
霜後則老而多筋乾之即曰乾生薑乾薑者即所取  
薑種水淹三日去皮置流水中漂浸六日更刮去皮  
然後晒乾入瓷缸中覆釀三日乃成以白淨結實者  
為良故人呼為白薑入藥則宜炮用

先人云辛溫夏長色相微紅具火大之力通心王之  
令若降下之陰不及醞藉之德稍遜者所當避忌又  
云血病有二陽乘陰而血溢者其治在陽以寒待之

陰乘陽而血溢者其治在陰以溫待之

參曰薑疆也界也如營衛氣血陰陽表裏踰越疆界者能使之各各旋歸有如捍禦外侮之侵犯邊疆者味辛氣溫宣發生陽之氣充益火大之源以消陰翳冷氣寒酸木僵設火毒熾盛豈堪僭服故治胸滿欬逆之因肺氣浮越血衄妄行之因陰氣乘陽常自汗出之因營弱衛強風濕成痺之因氣不宣通腸癖下痢之因脾胃虛寒致水穀失於遊溢生者宣發乾者

溫中去臭氣者生陽能辟濁陰也生陽宣發即通神明之驗耳

金曰從革從革作辛蓋以辛勝稟庚辛之味獨專新秋前後三庚日三伏正所以緩火刑也秋熱則燥金殆甚金且難於從革從革更難作辛矣故秋熱則無蓋蓋之畏日亦此意也

本經中品

苦參氣味苦寒無毒主心腹結氣癥瘕積聚黃疸溺有餘瀝逐水除癰腫補中明目止淚

覆曰生汝南山谷及田野間近道處處有之苗高三

四尺葉青色細碎極似槐葉春生冬凋花色黃白七月結角如萊菔莢內有細子二三粒如小豆而堅根三五料並生長五七寸兩指許大色黃褐味極苦生河北者無花無子苗莖根葉皆相若也五六月采根暴乾修治用糯米濃泔汁浸一宿有腥穢氣浮在水面上者須重重淘過即蒸之從巳至申晒乾用玄參為之使惡貝母兔絲子漏蘆反藜蘆

參曰苦者言其味參者言其功力相參上下內外也

炎上作苦故一名陵節一名岑莖苦性走下故一名地槐一名野槐苦能入骨故一名苦骨一名虎林復名水槐菟槐苦識者稟水曰潤下之寒化爾合從至陰對待火熱為因積聚為證者也更觀根生三五並立亦若三相參伍相伍故得自參以上明目止淚自參以下逐水餘瀝自參以外除癰腫黃疸自參以內破結氣癥瘕蓋心腹居中積聚火熱斯成衆肯對待火熱所以補中方能參乘上下以及內外參之功用

大矣

本經中品

知母氣味苦寒無毒主消渴熱中除邪氣肢體浮腫下水補不足益氣

覈曰出瀕河懷衛彰德解州滁州彭城諸處二月宿根再發四月開花色青如韭八月結實根至難死掘出隨生修治槐砧上剉細木臼搗爛勿犯鐵器

參曰知母天一所生水德體用具備者也故主濡潤

燥涸對待熱中除邪氣肢體浮腫潤下水道者也設  
舍肺金之母氣難以游溢轉輸矣何也母氣之藏真  
高於肺以行營衛陰陽乃能游溢通調轉輸決瀆耳  
蓋益氣者亦母益子氣補不足者亦母能令子實也  
原夫金為水母知母者如子知有母也別名蜨母蚬  
母者依母彰名也兒草兒踵昌支者繇母命名也水  
浚水參水須者離母立名也連母者正顯子連母義  
貨母者即子母遞遷以成變化也知此則立名之義



或遠取物近取身可深長思矣

本經中品

白薇氣味苦鹹平無毒主暴中風身熱支滿忽忽不知人狂惑邪氣寒熱疲疼溫瘧洗洗發作有時

覈曰出陝西及舒淶潤遼諸州近以山東沂濮莒萊諸州者稱勝莖葉俱青頗類柳葉六七月開紅色花遂結實根似牛膝而細長尺許色黃微白芳香襲人者白薇也色白微黃折之易斷者白前也修治用糯

米泔浸一宿去麤槐砧上剉細蒸之從申至巳晒乾  
用惡黃耆大黃大戟乾薑大棗乾漆山茱萸

參曰白薇別名白幕白者金色堅剛之體也微者隱  
也隱身而行幕者軍行之幕以隱身也此指能治因  
所治證以詮名耳氣平味苦鹹平則不上不下敦土  
德化禦所不勝也炎上作苦苦性走下苦能入骨潤  
下作鹹鹹性走血鹹能更堅從巔及踵淪膚徹髓靡  
不周到者也謂所勝因善行數變亦靡不周徧故也

故主因於暴風隱身而為身熱肢滿忽忽不知人狂  
惑邪氣寒熱痠疼此風氣留其處故隱身而常在也  
或隱身而行而為溫瘧洒洒發作有時此風併衛居  
隨衛氣之晝行於陽夜行於陰沉以內薄故發有期  
而時作時休也此皆暴風數變之證金以制之制所  
勝也別錄主淋露遺尿即風隱膀胱也若水氣精損  
即風隱於腎致令腎虛精涸腎虛水泛也若忽如死  
人即風隱於血致令血厥也若溫病多眠即風隱於

脉道致令衛氣不得晝行於陽也若瘕則風隱於筋  
驚則風行致令氣上也咸以暴風為因寒則非所宜  
矣

本經中品

紫草氣味苦寒無毒主心腹邪氣五疸補中益氣利九  
竅

覈曰出礪山山谷及楚地今出襄陽多從南陽新野  
來二月逐壟下子苗似蘭香赤莖青節紫花白實其

實秋月乃熟也春社前後采根頭有白毛如茸以石壓扁暴乾收時忌人溺及驢馬糞并烟氣能令根黃如未花時采取根色鮮明如已作花根色黯惡染色亦不堪用也修治每觔用蠟二兩鎔水拌蒸水盡為度去頭并兩畔髭細剉用

先人云紫草色勝葢肝主色而肝之色又從風化凡病變於色者相宜然肝疏二便餌之大小便利為外徵也

參曰紫間色水乘火色也氣寒味苦臭芳性潔稟水  
氣澄湛之體捍格之用主心腹濁邪熱氣鬱作五黃  
損氣閉竅者力能捍格而澄湛之別錄廣心腹邪氣  
及腫脹滿痛利九竅及通水道若兒瘡即熱濁於血  
面皴即熱濁於氣於色耳蘄陽廣兒瘡及斑疹豆毒  
活血涼血以利大腸經驗方云痘瘡三日隱隱將出  
色赤便閉者相宜曾世榮云脾實協熱者可用脾虛  
協寒者不可用慎之慎之

兒醫用藥尚新無暇察色問證詳確病因致死生  
存亡莫之能測曾世榮及經驗方言簡意盡德庇  
世後

本經中品

蔥莖白氣味辛平無毒作湯主傷寒寒熱中風面目浮  
腫能出汗

覈曰所在有之凡四種山谷者曰蒼蔥陸地者曰胡  
蔥凍蔥漢蔥一名木蔥莖薄味淡春時開花作  
子卒黑而三瓣凍蔥一名冬蔥又名慈蔥或名大官

葱莖柔而香不結子分莖栽蒔夏衰而冬盛胡蔥莖  
葉粗硬荅蔥似胡蔥而稍細荅蔥療病凍蔥入藥最  
美也

參曰白根層理綠莖空中上達橫徧陽氣前通之象  
也方之奇方急方劑之宣劑通劑也故主陽氣閉塞  
致寒風外侮作湯蕩滌之前通陽氣揚液為汗也先  
人云蔥葉離白轉大去根氣味更勝故從根抵直徹  
巔頂仲景云少陰病面赤者四逆湯加蔥白主之先



人云陰經面赤謂之戴陽葱白不離於陰以通陰中  
之陽也蘄陽云葱管吹鹽入玉莖內治小便不通及  
轉胞先人云雖是吹入實是透出雖是下通實是上  
達活人書云頭痛如破者連根葱白半斤佐生薑二  
兩水煮溫服先人云病頭用根欲從甲乙直作丙丁  
邪始淨盡深師方云胎動下血痛極搶心葱白煮濃  
汁飲之未死即安已死即出先人云葱白雖通陰分  
之陽其機輕捷使邪遽出無容留礙故中氣無損妊

娠為宜宗爽云葱主發散多食昏神先人云發散心  
王之邪其機數數寧免自傷又云其氣開出當入太  
陰其性通明當入陽明倘陽明闔機不及者投之為  
害不淺又云卒中悶絕多屬陽氣閉塞葱力內開骨  
節外達毫竅下及跖踵上徹巔頂可使生陽徧周四  
大若出入之神機廢弛無能為矣

本經中品

澤蘭氣味苦微溫無毒主乳婦內衄中風餘疾大腹水

氣四肢浮腫骨節中水金瘡癰腫瘡膿

覈曰所在有之多生水中二月生苗莖方節赤四葉  
相值葉似蘭草但不甚香枝葉間微有白毛為異七  
月作萼色純紫開時色紫白根色青紫與蘭草亦相  
類也修治細剉以絹囊盛之懸於屋之南畔角上陰  
乾取用

參曰澤蘭生水中乃水氣所聚澄潔水體宣通水用  
者也故主乳婦內衄大腹水腫四肢浮腫骨節中水

及金瘡癰腫瘡膿悉屬體失澄潔用失宣通其辟不  
祥與中風餘疾皆體用功力耳

本經中品

白鮮根皮氣味苦寒無毒主頭風黃疸欬逆淋瀝女子  
陰中腫痛濕痺死肌不可屈伸起止行步

覈曰出河中江寧滁州潤州而蜀中者為勝苗莖都  
青葉色稍白如槐葉亦如茱萸葉四月開花淡紫色  
似小蜀葵花根似小蔓青皮黃白而中實氣臭正似

羊羶也春采者堅白夏采者虛惡惡螻蛄桔梗茯苓  
葷薤

先人云羶者肝之臭當入肝為肝之用藥從治風氣  
者也亦可入脾除濕脾以肝為用耳

參曰白曰金鮮曰腥金之色與臭也又不以壽終者  
曰鮮故唯春采者堅白夏采者虛惡以方生則力銳  
形腐則氣萎而力不專矣味苦氣寒對待以熱為病  
以風為本如風中頭而標頭風鬱肌層而標黃疸入

毫竅而標欬逆客勝肱而標淋瀝侵陰中而標腫痛  
更合濕曰痺如痺肌而標死肌痺筋而標不可屈伸  
及起止行步不正也設合寒本氣味不相投矣

本經中品

山茱萸氣味酸平無毒主心下邪氣寒熱溫中逐寒濕  
痺去三蟲久服輕身

覆曰生漢中山谷及瑯琊冤句今海州兗州近道諸  
山中亦有木高一二丈葉如梅而有刺二月開花如

杏四月結實如酸棗深赤色一種葉餘花實俱相似  
但核有八稜名雀兒蘇別是一種不堪入藥修治以  
酒潤去核緩火熬乾勿誤食核令人滑精蓼實為之  
使惡桔梗防風防已

先人云酸溫津潤合從水藏之精液亦非自力所能  
致必欲待人待時而興者

參曰萊諧朱謂木胎火含陽於內也莫諧史謂冤曲  
從乙木之性也春半開花夏半結實色赤味酸入肝

之體肝之心藥也心下為寒熱所薄則火失煖熱性  
茱萸溫中對待治之痺逐蟲去而身輕矣客曰肝主  
疎泄癰閉者當用茱萸別錄止小便利者何也頤曰  
此肝用太過茱萸補體使體用均平耳

本經中品

赤小豆氣味甘酸平無毒主下水腫排癰腫膿血

覈曰赤小豆廣雅稱荅蘇恭單稱赤豆葉曰藿近世  
咸用赤黑相間之草實為赤小豆者謬甚矣此豆以



緊小而赤黯色者入藥最良稍大而鮮紅及淡紅色者僅堪供食并不療疾俱於夏至後下種苗科高尺許枝葉似豇豆葉微圓峭而小至秋開花亦似豇豆花淡銀褐色而有腐氣莢長二三寸似萊豆莢而稍大皮色微白帶紅三青二黃時收之可食入藥用者必須老赤也

參曰豆為腎水之主穀赤小者又為腎之心物水之用藥矣故主水用不行致作水腫及癰膿爾別錄廣

之治寒熱熱中消渴者以寒本之氣入通於腎而病  
熱標之亦腎氣不周於胸消渴引飲也洩利癰閉正  
水無用腹滿為樞機轉闔吐逆卒澀為開闔兩持仲  
景先生赤小湯療傷寒瘀熱在裏身必發黃之義可  
默悟矣

本經中品

大豆黃卷氣味甘平無毒主濕痺筋攣膝痛不可屈伸  
覆曰造黃卷法壬癸日以井華水浸黑大豆候芽長

五寸乾之即為黃卷用時熬過服食所需也

參曰大豆作黃卷比之區萌而達蘖者長十數倍矣  
從艮而震震而巽矣自癸而甲甲而乙矣始生之曰  
黃黃而卷曲直之木性備矣木為肝藏藏真通於肝  
肝藏筋膜之氣也大筋聚於膝膝屬谿谷之府也故  
主濕痺筋攣膝痛不可屈伸屈伸為曲直象形從治  
法也

別錄中品

水銀氣味辛寒有毒主疥癬痂瘍白禿殺皮膚中蟲墮  
胎除熱伏金銀銅錫毒鎔化還復為丹久服神仙不死  
覈曰原名湏一名汞汞與湏同剛目名靈液藥性名  
姹女此丹竈家言也古采符陵平土今采秦州商州  
道州邵武軍者淮南子言弱土之氣御於白天生白  
礬白礬生白湏陶弘景言是出硃砂腹中者佳亦有  
別出沙地色青白者為之生湏或硃砂粗末或山石  
折裂采其砂石燒煨成者色小白而濁皆不及生湏

之能應化無方也陳霆墨談云拂林國當日沒處有  
瀕海周匝七八十里國人取之近海十數里掘坑塹  
數十方乃使健夫駿馬徧體粘貼金箔行近海隅日  
光晃耀瀕則滾沸如潮湧逐而至若琥珀之遇芥磁  
石之見鐵蓋瀕以金為食也遂回馬疾馳俟湧逐之  
勢漸緩遇坑塹則溜積於中否則人馬亦為之累沒  
矣取得此品合香草煎製便成白金為丹家至寶世  
用熟瀕燒煉經數十百世曾未成丹者以熟瀕氣去

形存名曰陰符又曰死尸徒消年歲終不可得也一  
種草瀕法用細葉馬齒莧先以槐木槌熟向日東作  
架暴二三日經久更善乃燒灰存性置瓦甕中封固  
甕口埋土內四十九日則瀕成矣每莧百觔可得瀕  
三兩或十兩胡演丹藥祕訣云取硃砂瀕法用瓷瓶  
盛硃砂不拘多寡以紙封瓶口香草湯煮一伏時先  
於地上掘一土坑置一鐵盤於坑內次以瓷瓶倒覆  
盤內遂用鹽泥封固近盤瓶口更築實以土露瓶下

節之半於土上圍以栗炭煨二炷香火息氣冷瀕自流湔盤中矣每硃砂末一觔可得瀕十兩舊坑明透好砂可得瀕十五兩邕州溪洞燒取極易以百兩為一銚銚之制似豬脬外糊厚紙數重貯之即不走漏若散失在地以川椒末或茶末收之或真金及鍮石引之即止嘉謨云去瀕之砂鬼名曰天琉丹竈家用之修治勿用草瀕并硃漆中燒出者或經別藥制過者或死尸中流者誤服為毒甚深不可不辨必取生

瀕但不得唯砂末燒取者乃可用之用紫背天葵  
夜交藤汁同煮一伏時以去其毒修治十兩二汁合  
用七鎰宗爽云瀕得鉛則凝得硫黃則結銅得之則  
明灌尸中則後腐以五金置其上則浮得紫背天葵  
紫河車則伏得川椒則收可以勾金可以湧泉匱蓋  
藉死瀕氣也並棗肉研乳則散別法制之則成膩粉  
粉霜吐唾研之可死蟲蟲也土宿真君云荷葉松葉  
松脂穀精草萱草金星草瓦松夏枯草忍冬葭蓂子



鴈來紅馬蹄香獨枝蓮水慈姑萬年青蒼耳草陸六  
藤白花充蔚皆能制汞

參曰水銀似水如銀也原名瀕瀕從水項聲音為水  
銀瀕俗作水銀汞者謬矣瀕者天地鴻洞未分之象  
也故瀕含水而流含風而動含火而鎔含地而堅顯  
諸木而色華青顯諸火而還丹赤顯諸土而峭粉黃  
顯諸金而凝霜白顯諸水而結砂玄隨合仍分隨分  
仍合徧周四大攢簇五行神仙不死藥也顧注留九

竅死且不朽況餌服者乎故對待生欲速朽者為疹  
癰為痂瘍白禿殺皮膚中蟲其功特著有言氣寒為  
陰金之屬者恐失體用相盪之為性矣

本經中品

石硫黃氣味酸溫無毒主婦人陰蝕疽痔惡血堅筋骨  
除頭禿能化金銀銅鐵奇物

覈曰出東海牧羊山谷及太行河西山今南海諸番  
嶺外州郡亦有不及崑崙雅州舶上來者此火石之

精礬石之液也所在之處必有溫泉作石硫黃氣以  
顯塊瑩淨光膩色黃嚼之無聲者彌佳夾土及石者  
不堪入藥一種赤色者曰石亭脂青色者曰冬結石  
驚黃色者曰崑崙黃半白半黑者曰神驚石並不堪  
用又有一種水流黃出廣南及資州從溪澗水中流  
出以茅收取熬出者曰真珠黃氣極腥臭堪入瘡藥  
一種土硫黃出閩漳對海有山名雞籠頭刮取山邊  
砂土日中暴乾和牛脂煎研去砂土漉出清汁乾之

即土硫黃也入藥亦佳修治先以萊菔剉空置硫黃於萊菔空內合定用稻糠火煨熟去其臭氣再以紫背浮萍同煮一日消其火毒更以皂莢煎湯淘之去其黑漿曾青為之使畏細辛飛廉朴消鐵錯

參曰石硫黃偏得山石慄悍之性陽燧為體動流為用者也氣稟火溫味兼木酸蓋木從火得風自火出故爾合入厥陰從乎中治故主陰蝕疽痔及惡血為青無以奉髮美毛正骨柔筋者悉屬陰凝至堅對待

治之陽生陰長陽殺陰藏矣化金銀銅鐵奇物此火之精礬之液耳

厥陰之上風氣主之中  
見少陽少陽相火也

### 本經中品

白馬陰莖氣味甘鹹平無毒主傷中絕脈陰痿不起強志益氣長肌肉肥健生子

覈曰馬生雲中白者入藥最良雲中今大同府東南者弱劣不堪用耳孕十有二月而生應陰以紀陽也

蓋陰合於八八合陽九八九七十二二主地地主月  
月精為馬月數十二故十有二月而生月度疾故善  
走也一歲曰犢二歲曰駒三歲曰騊八歲曰馱八歲  
一變故從八也欲知其歲以齒別耳種類雖多咸以  
色取如爾雅云小領盜驪絕有力駢膝上皆白惟馬  
四肢皆白驢四蹄皆白首前足皆白驥後足皆白駒  
前右足白啟左白蹄後右足白驤左白犢驪馬白腹  
驪驪馬白跨驪白州驪尾本白驤尾白驤駒額白顙

白達素縣面額皆白惟駝回毛在膺宜乘在肘後減  
陽在幹第方在背閔黃逆毛居駝騾牝壯玄駒裏  
驂壯曰隲牝曰駘駢白駁黃白驄駢馬黃脊騄驪馬  
黃脊騄青驪駢青驪驕騄驪青驪繁鬣騄驪白雜毛馮  
黃白雜毛駉陰白雜毛駟蒼白雜毛騄彤白雜毛駮  
白馬黑鬣駱白馬黑唇駘黑喙駟一目白睂二目白  
魚如宗廟齊毫戎事齊力田獵齊足此言所尚如駒  
駘野馬駮如佺牙食虎豹駢蹠趺善陞甌駢蹠枝蹠

趺善陞觀此屬異品凡相馬者先除三羸五駑乃相其餘肝欲得小耳小則肝小肺欲得大鼻大則肺大脾欲得小膝小則脾小心欲得大目大則心大又云眼欲得有紫艷口欲得有紅光上唇欲得緩下唇欲得急上齒欲鈎鈎則壽下齒欲鋸鋸則怒脊欲大而抗頤欲方而平喉欲曲而深胸欲直而出免間欲啟虎口欲開升肉欲大而明輔肉欲大而朗耳欲如劈竹睛欲如懸鈴頭欲高如剝兔項欲起如飛龍又云



人眼鳥目鹿背麟腹虎胸龜尾擎頭如鷹垂尾如箕  
又云望之大就之小筋馬也望之小就之大肉馬也  
前視見目旁視見腹後視見足駿馬也毛束皮皮束  
筋筋束肉肉束骨五者兼備天下之馬也又云口中  
紅白間色者壽鼻中紅色如朱點書者壽眼中赤色  
如字形者壽動則逸靜則殃起先前足臥先後足常  
臥則病常立則安有肝無膽者畜生於午稟火氣而  
生者馬火不能生木故有肝無膽膽者木之精木藏

不足故食其肝者死修治取銀色無病白馬春月游  
北時力勢正強者生取陰乾百日用時以銅刀破作  
七片將生羊血拌蒸半日晒乾粗布拭去皮及乾血  
剉碎用

參曰本經取馬以白為良故五畜以馬為金也蓋十  
二辰午為馬謂陰始生於午六陽之化太陰之屬也  
是主手太陰肺足太陰脾藏真濡於脾脾藏肌肉之  
氣也故主長肌肉而肥健藏真高於肺以行營衛陰

陽也故主傷中絕脉而益氣若強志有子為水藏事  
水以金為母土為制制則化生耳若主陰痿不起正  
陰始生於午自強而不息應陰以陽紀也

本經中品

牡狗陰莖氣味鹹平無毒主傷中陰痿不起令強熱大  
生子女子帶下十二疾

麋曰狗有三守狗獵狗豢狗也在禽為婁卦為艮五  
行為木十二子為戌斗精所生也七九六十三陽氣

生故狗三月而生也三子曰獫狁二子曰獅一子曰獬豸  
未成曰毫爾雅云狴犴狗也犴犬多毛也獬豸吠不  
止也獬豸知人心所使也狴犴犬也狄赤犬也耗白  
犬也狡小犬也獬犴黑色韓良犬狴犴黑白宋良犬也狴  
犴逐虎犬也窮奇驅妖神狗也長喙曰獬狁短喙曰獨去  
勢曰猗高四尺曰獬狂犬曰獬善守者喙長善獵者  
喙短供饌者體肥入藥者守狗也獵者搏食守者苟  
食性險而出警吠止禦故良為狗良陽在上故也豺

見之跪虎食之醉食木驚則死遼東有鷹產必三卵  
一鷹一鵠一犬以禽乳獸類化生也又老木之精狀  
如狗色黑無尾烹之可食無情之感精靈之變也荆  
楚記云雞寒狗熱畏杏仁反商陸合蒜食損人同菱  
食生癩犬不炙食令人消渴妊婦食之其子無聲熱  
病後食之卒殺人也病犬狂犬自死犬有大毒懸蹄  
之犬赤股而躁者其氣臊犬目赤者有屍毒不則欲  
狂而尾垂矣

參曰犬象形孔子曰視犬字如畫韓子云蠅營狗苟  
狗苟故從苟也埤雅云犬獵狗狩狩以守之獵以逐  
之孔子曰狗叩也叩氣吠以守也其羣以時言能守  
也對待不知持滿以欲竭精致傷中陰痿不起者功  
能警禦嚴守令強熱大必持其精氣滿溢而寫則生  
子矣女子帶下十二疾可默會矣

本經下品

代赭石氣味苦寒無毒主鬼症賊風蠱毒殺精物惡鬼

腹中毒邪氣女子赤沃漏下

覈曰出代郡及姑幕北山經云少陽之山中多美赭  
西山經云石脆之山灌水出焉中有流赭管子云其  
山有赭其下有鐵處處山中亦有之西北者為良也  
生山峽中者赤紅青色而有澤上紋如浮漚俗呼丁  
頭赭修治細研以臘水重重飛過水上有赤色如薄  
雲者去之澄淨去水再以茗汁煮一伏時取出研萬  
餘匝用鐵鐺燒赤下白蠟一兩待化投新汲水衝之

再煮一二十沸取出晒乾用

先人云去浮赤奪其先聲烹白蠟培其根本肝與血大獲保任矣

參曰靈樞稱衛氣為帥氣隱居稱大赭為血師則大赭當為營氣之司命矣經云命曰營氣以奉生身莫貴乎此先人云鬼疰三證大為生氣之害然必伏匿陰血中乃肆毒惡赭色丹青承宣君相火為血師保任仍令就規矩會尺寸以合五十營奉身生氣如常



營血安堵如故矣

本經下品

戎鹽氣味鹹寒無毒主明目目痛益氣堅筋骨去毒蠱  
覈曰戎鹽即青鹽亦赤鹽也史書言虜中鹽有九種  
曰白鹽食鹽黑鹽胡鹽柔鹽赤鹽馱鹽臭鹽馬齒鹽  
而戎鹽即胡鹽日華一名羌鹽唐本一名壳登鹽大  
明一名陰土鹽生沙崖山坂之陰土石間也大小不  
常形作塊片間有方稜或如雞卵或如菱米堅結似

石色玄紫白味不甚鹹臭若蝦鷄之氣燒之不鳴炔  
者是也京州異物志云姜賴之墟今稱龍城剛鹵千  
里蒺藜之形其下有鹽累碁而生又云鹽山二岳二  
色為質赤者如丹黑者如漆小大從意鏤之為物作  
獸辟惡佩之為吉咸稱戎鹽可以療疾張果云赤戎  
鹽生西戎稟自然水土之氣結而成質其地水土之  
氣黃赤故鹽亦隨土氣而生味淡於石鹽力伏陽精  
火中燒之汁仍紅赤凝定時色益赤者為真再燒之

最久赤轉為青矣故一名絳鹽西京記云有青鹽池  
出青鹽正方寸半其形如石味甚甘美真臘記云山  
間有石味勝於鹽可琢為器梁杰公傳云交河之間  
掘磧下數尺有紫鹽如紅如紫色鮮而甘其下丈許  
必有瑩珀北戶錄云張掖池中生桃花鹽色如桃花  
隨月盈縮今寧夏近涼州地鹽井所出青鹽四方皎  
潔如石山丹衛即張掖地有池產鹽紅色此二鹽者  
即戎鹽之青赤二鹽也今方書但用青鹽不用赤鹽

并目赤鹽為異物矣本草云北海產青鹽南海產赤鹽總從西戎來所謂南北者指西海之南北耳嶺南一種紅鹽用色染成非真赤鹽也燒之出白汁凝定仍轉白色矣丹房鑑源云蠻鹽可伏雌雄唯赤鹽為上獨狐滔云戎鹽累卵乾瀕制土砂

參曰煮海為鹽若戎鹽者鍾海水自然之精氣不假人力為也生海北者黑如漆海南者赤如丹赤則水劣火勢黑則火勢劣水燒之最久黑者赤赤者黑矣

以緣水火為性不越水火為色遞以水火為勝劣亦  
遞以水火為功用也故主精明眼識為緣生於眼識  
蓋識精緣水為根緣明為塵塵為火用根為火體故  
爾若益氣堅筋骨去毒蠱此寶明澄湛之休徵耳

寶明即火澄湛即水經云  
寶明生潤水從火出矣

### 本經下品

貫衆氣味苦微寒有毒主腹中邪熱氣諸毒殺三蟲  
穀曰出玄山山谷及冤句少室山今陝西河東州郡

及荆襄間多有之生山陰近水處冬夏不死數根叢生每根必有多莖貫之莖作三稜如蕨狀有黑色汁頗涎滑也其葉兩兩對生如雞翎及鳳尾又似狗脊葉而無鋸齒色青黃面深背淡四月花白七月實黑相聚連卷而旁生其根曲而有尖背黑鬚叢族亦似狗脊根狀及伏鵝皮黑肉赤直而多枝若百頭也藟藟赤小豆為之使伏石鍾乳

先人云百頭而以一貫故名貫衆連卷有夏脈如鈎

之象是心物無疑矣腹中邪熱是夏氣在藏之病從血脈流入心腹之部者當須此品

參曰根具百頭獨莖葉兩兩相對若偶貫羣陰也因名貫衆多生山陰近水處故稟苦寒氣味對待陽不貫陰而成邪熱理不貫經而成諸毒生陽不貫四大而成三蟲亦地以陽殺陰藏之象歟

既連卷有夏脈如鉤之象則百頭一貫有心主百脈宗主之象矣假以治百合病者頗象形百合病者百脈一宗悲致其病故也

本經下品

白芨氣味苦平無毒主癰腫惡瘡敗疽傷陰死肌胃中邪氣賊風鬼擊痲緩不收

覈曰出北山山谷及冤句越山江淮河陝漢黔諸州春生苗長尺許葉如初生機苗及藜蘆兩指許大色青翠三四月葉中出條開紫花宛如草蘭即菰蘭也結黃黑實根色白似菱有三角角頭生芽節間有毛質極粘膩可作糊也紫石英為之使惡理石畏李核



仁杏核仁反烏頭

參曰白金及至也金至斯堅故主癰腫瘡疽死肌痂  
緩不但堅形亦可堅藏填肺生葉填脈生血堅固歸  
金金歸地大故也

杭郡獄中有犯大辟者生肺癰膿成欲死得單方  
服白芨末遂獲生全越十年臨刑其肺已損三葉  
所損處皆白芨末填補  
其間形色猶未變也

本經下品

連翹氣味苦平無毒主寒熱鼠瘻癰瘰癧腫惡瘡癰瘤

結熱蠱毒

卷六

覈曰出太山山谷今汴京及河中江寧潤淄澤兗鼎  
岳利諸州皆有之獨蜀中者為勝有大翹小翹兩種  
大翹生下濕地或山岡上葉青翠如榆葉水蘇葦莖  
高三四尺而色稍赤獨莖梢開花黃色可愛三秋着  
子似蓮實之房亦若椿實之未開者翹出衆草殼小  
堅外完無附萼剖之中解氣甚芳馥實纔乾振之即  
落若不著莖根如青蒿之白硬也小翹生岡原之上

莖葉花實皆似大翹但細小耳古者莖葉花實並用  
今惟用實未見莖葉也南方一種莖短葉小惟實黃  
黑子如粟粒乃旱蓮又一種如菡萏殼柔軟外有附  
萼抱之且無解脈亦不芳香乾之不落久着莖上功  
用殊別也

參曰內經常以車蓋喻脈狀曰藹藹如車蓋者陽結  
也亦陽盛也本經乃以連翹名藥左傳云翹翹車乘  
連連翹翹如車乘爾此形相似亦病相類也其主熱

結儼若陽結陽盛乎一名連軺軺亦小車也蓋車者  
引重致遠以濟不通周禮云車有天地之象是合陰  
陽內外而言誠開闔之樞鍵也故主熱結在中為寒  
熱鼠癰癰瘰其本在藏其末在頸腋間也若蠱毒此  
但沈於藏癰瘤癰腫此但浮於脉咸屬寒熱為病因  
熱結為形證者也其功力與夏枯相等但夏枯偏於  
從本秉寒水化令故上徹巔頂下及跗踵連翹偏於  
從末秉容平氣味故外彌膚腠內偏五中至於解從

結心理則一矣先人云連翹治鼠癰癰腫瘡癰咸從  
結氣所生取其象形易落而能自散也綱目謂狀似  
人心故入心以痛痒瘡瘍皆屬心火也東垣謂十二  
經瘡藥中不可無此何必似人心狀乎顧獨莖赤色  
及結實在上原具心象又云散血結氣聚此以結治  
結當用上聲之散不當用去聲之散散則自散而省  
力散則分散而有為此先人備言所治之證頗但略  
言能治之因合能所生成則命名之義了然矣

本經下品

白欬氣味苦平無毒主癰腫疽瘡散結氣止痛除熱目  
中赤小兒驚癇溫瘧女子陰中腫痛帶下赤白

覆曰生衡山谷及江淮荆襄懷孟商齊諸州二月  
生苗多在林中作蔓赤節葉小如桑五月開花七月  
結實根如雞鴨卵而稍長三五同窠皮黑肉白一種  
赤欬花實功用少別表裏都赤也代赭為之使反烏  
頭

參曰斂從父音酣平聲與斂從支音廉上聲者迥別  
有以斂訓聚斂之斂謬矣蓋斂欲也遂也金也潔也  
堅潔遂欲以功用證名也故與白芨相參古方多並  
用之但白芨因風致動而金至斯堅白斂因熱致結  
而金遂斯解良繇金壞為形證此更堅形堅藏平定  
陰陽內外上下以及血氣之傾移者也

四大地大曰金與五行金行少有異同五行之金  
在藏歸肺在形歸皮毛四大之金凡屬堅固有形  
統歸地大合五行  
中土金而言也

本經下品

烏頭氣味辛溫有大毒主中風惡風洗洗汗出除寒濕痺效逆上氣破積聚寒熱其汁煎之名射罔殺禽獸

覈曰烏頭與附子同種蓋初化之形物也近取野生者別無釀造之法唯多歷年月則氣力勇悍其毒轉甚處處有之苗葉花實並類川烏根外黑內白皺而枯燥酉陽雜俎云雀芋狀如雀頭置乾地地反濕濕地地反乾飛鳥觸之墮走獸遇之僵一曰烏草即烏



頭之野生者修治用文武火中炮令皺折劈破用莽草為之使反半夏括樓貝母白欬白芨惡藜蘆

參曰烏日魄也兼天雄附側之陽而首出之命曰烏頭經云陽氣者若天與日是故陽因而上衛外者也故主中風惡風汗出洗洗致衛氣散解者力堪衛外而為固者也寒濕合痺致欬逆上氣積聚寒熱致內閉不通外壅肌肉者力主婢通而起亟之先人云人病有四曰痺風痿厥烏力唯宣痺風陽行有四曰升

降出入鳥力唯從升出但陽喜獨行而專操殺業在  
剛愎人所當禁忌又云有家時有野生野生無人氣  
無理法與生人反鳥獸不可與同羣一味草鳥而已

本經下品

附子氣味辛溫有大毒主風寒欬逆邪氣寒濕痿痺拘  
攣膝痛不能行步破癥堅積聚血瘕金瘡

覈日出犍為山谷及少室近以蜀道綿州龍州者良  
他處雖有力薄不堪用也綿州即故廣漢領縣凡八

唯彰明出附子彰明領鄉凡二十唯赤水廉水昌明  
會昌出附子而赤水為多每歲以上田熟耕作壟取  
種於龍安龍州齊歸木門青埕小平諸處十一月播  
種春月生苗莖類野艾而澤葉類地麻而厚花則瓣  
紫莖黃苞長而圓實類桑椹子細且黑七月采根謂  
之早水拳縮而小蓋未長成耳九月采者佳其品凡  
七本同而末異也初種之化者為烏頭少有旁尖身  
長而烏附烏頭而旁生雖相須實不相連者曰附子

左右附而偶生者曰鬲子種而獨生無附長三四寸者曰天雄附而尖者曰天錐附而上出者曰側子附而散生者曰漏藍子皆脈絡連貫如子附母而附子以貴故專附名也凡種一而子六七以上則皆小種一而子二三則稍大種一而子特生則特大而附子之形以蹲坐正節角少者為上有節多鼠乳者次之形不正而傷缺風皺者為下矣又附子之色花白者為上鐵色者次之青綠者為下天雄烏頭天錐皆以

豐實盈握者為勝漏藍側子如園人乞役卑卑不數也漏藍即雷公所謂木鼈子大明所謂虎掌鬲子即烏喙天錐即天雄類方書並無此名功用當相同爾然而易植難成功疎質變或種美而苗不茂或苗秀而根不充或已釀而腐或已曝而攣原屬氣化又復化氣成消若有神物陰為之者故園人嘗禱於神目為藥妖者以此修治入柳木灰火中炮令皺折竹刀刮去孕子并底劈破於屋下平地掘一土坑安之至

明取出焙乾若陰製者生去皮尖及底薄切作片用  
東流水及黑豆浸五日夜取出日中晒乾地膽為之  
使惡蜈蚣畏防風黑豆甘草人參黃耆

參曰附子天雄側子即烏頭種子奇生無偶者曰天  
雄偶生旁立者曰附子旁生支出者曰側子側子青  
陽附子顯明天雄巨陽耳故附子司顯明主潤宗筋  
束骨而利機關也顯明陽虛則宗筋縱致蹠蹻拘攣  
膝痛不能行步矣併司宗氣不會呼吸為欬逆及血

失氣响為癥堅積聚者莫不繇風寒寒濕為痺因不能則為病為熱為形證者也設肺熱葉焦發為踠蹇者所當避忌先人云欬逆邪深寒濕氣死機關已弛堅凝固結者匪此真火點化未易開通耳

青陽少陽也顯明陽明也巨陽太陽也顯明陽虛之踠蹇太陰陰虛之踠蹇差之毫釐謬則千里

### 本經下品

天雄氣味辛溫有大毒主大風寒濕痺歷節痛拘攣緩急破積聚邪氣金瘡強筋骨輕身健行

穀曰不生附側經年獨長而大者天雄也生成已具  
附子條內修治如附子法遠志為之使惡腐婢忌豉  
汁

先人云合名與形當屬陽中之陽祇能助長不能化  
育命門之用藥也

參曰天以體言雄以用言不雜於陰柔不惑於邪亂  
者也一名白幕幕者軍旅行舍喻天行健自強不息  
之象也主輕身健行望見其雄武矣若大風寒濕痺



證及積聚邪氣金瘡嫌於無陽者乃得行險而不失  
其正

本經下品

半夏氣味辛平有毒主傷寒寒熱心下堅胸脹欬逆頭  
眩咽喉腫痛腸鳴下氣止汗

覈曰出槐里川谷槐里屬扶風今青州齊州吳中浙  
中亦有之生丘澤田野間二月發苗一莖或三莖高  
八九寸莖端葉三淺綠色夏至半夏生連綴莖下也

形似羊眼圓白者為勝江南一種大徑寸南人特重之乃繇跋誤作半夏也又一種絕似半夏但咬着微酸者名白傍薺子並不入藥用修治每半夏四兩用白芥子末三兩以醎醋先調芥子末次將半夏投入洗之涎盡為度否則令人氣逆怒滿也射干為之使惡皂莢畏雄黃生薑乾薑秦皮龜甲烏頭

參曰月令半夏生蓋當夏之半也天地相遇品物咸章之時矣以純乾決盡至垢而一陰見故主陰陽開

闔之半關鍵之樞如半欲開半欲闔半欲開闔者莫不從令訓釋主治先人詳悉題藥矣

從半欲開處居多如傷寒熱頭眩少陽之樞半欲開也咽喉腫痛少陰之樞半欲開也心下堅胸滿欬逆身形之半欲開也腸鳴亦身形之中欲闔外欲半欲闔也下氣及汗出此則身形之中欲闔外欲也闔也

本經下品

虎掌氣味苦溫有大毒主心腹寒熱結氣積聚伏梁傷筋痿拘攣利水道

穀曰出漢中山谷及寬句安東河北州郡近道亦有  
之四月生苗高尺餘獨莖上有葉如爪一窠生八九  
莖時出一莖作穗直上如鼠尾中生一葉如匙裹莖  
作房旁開一口上下尖中有花青褐色結實如麻子  
熟便白色自落布地一子只一窠九月葉殘取根但  
初孕之根僅如豆大漸長者似半夏而扁年久者始  
圓及寸大如雞卵周匝生芽三四枝或五六枝圓如  
指頂宛若虎掌冀州一種呼天南星二月生苗高一

二尺莖似荷梗葉似蒟蒻兩枝相抱五月開花黃色似蛇首七月結實作穗似石榴子二八月采根似芋而扁與蒟蒻相類人多誤采了不可辨但蒟蒻莖斑花紫南星根小肌膩炮之易製為別然南星即虎掌同類而異種其根大者周匝亦有圓芽但不若虎掌莖葉似爪五出分列也江州一種草虎掌葉大如掌面青背紫三四葉為一本經冬不凋不結花實根之四畔亦有圓芽名象雖同治療迥別修治取重一兩

者氣專力倍用治風痰生用須溫湯洗淨再以白礬  
作湯或皂角煎汁浸二三日每日一換浸足暴乾熟  
用擇黃土地上掘一小坑深五六寸先以炭火燒紅  
次用好酒沃之乃安虎掌於坑內上以瓦盆覆定灰  
泥固濟過夜取用設急用用濕紙包裹埋糠灰火中  
周匝綻裂便可用矣一法以酒浸一宿用桑柴火蒸  
之常令洒酒入甑內令氣猛一伏時取出竹刀剖開  
味不麻舌為度一法以生薑杵碎和黃泥包虎掌煨

熟去泥焙用若造麴用生薑汁及礬作湯和虎掌末作小餅子安籃內楮葉包蓋俟上有黃衣生取晒收之造膽星法將虎掌研末臘月取黃牯牛膽汁和勻納膽囊內懸係有風處乾之年久彌佳蜀漆為之使惡莽草

先人云名色性氣合屬燥金味苦氣溫又得火化為肺金之用藥也與易稱燠萬物令燥者合其德當治風第可平諸疾生風不可平風生諸疾以非真實燥

故其治諸暴強直支痛裏急筋縮綆戾平以虎掌風  
從燥已矣

參曰命名虎掌不獨莖葉根莖形相似也虎力在掌  
故主寒熱氣結積聚伏梁以及心腹若探囊耳蓋掌  
用在筋且風生從虎故主厥陰風木變生筋主為病  
以致筋痿攣拘也風行水渙故并利水道

厥陰變青則風木之化不行焉虎嘯風生  
從其類也風感水受木道乃行故利水道

本經下品



常山氣味苦寒有毒主傷寒寒熱發熱溫瘧鬼毒胸中痰結吐逆

蜀漆氣味辛平有毒主瘡及欬逆寒熱腹中癥堅積聚邪氣蠱毒鬼症

覈曰出益州川谷及漢中今宜都建平海州汴西淮  
浙湖南並有之生山谷間莖圓有節高三四尺葉似  
茗兩兩相當二月作白花青萼五月結實青圓三子  
為房根似荊根色黃而皺苗即蜀漆也采時須連根

苗收用氣力始備性頗惡濕采即暴燥青白堪用否  
則黑爛鬱壞矣宜都建平者根形細實宛如雞骨取  
用最勝海州者葉似楸葉八月開花紅白似山楝而  
小又天台一種土常山苗葉並甘而涼頗適口非同  
類也修治如用蜀漆臨時去根同甘草相拌水潤蒸  
之去甘草細剉再以甘草汁拌蒸晒乾取用如用常  
山臨時去苗用酒浸一宿取出晒乾熬搗用常山畏  
玉札蜀漆惡貫衆拈樓為之使

參曰經久不遷之謂常宣氣散生之謂山蓋以止行  
行止為體用故一名互草從治傷寒溫瘧之體似止  
顯寒熱往來之用似行及鬼毒與胸中結痰吐逆之  
似止而行似行而止者苗曰蜀漆山獨之謂蜀水瀉  
欲留之謂漆故功用相同略分內外上下之異耳

合石膏參看便知彼此功力差別石膏之止止有  
凝義行有散義常山之止止有停義行有流義

### 本經下品

芫花氣味辛溫有小毒主欬逆上氣喉鳴喘咽腫短氣

金匱要略卷六  
蠱毒鬼瘡疔瘰癧腫殺蟲魚

覈曰出邯鄲及絳州所在亦有莖幹不全類木亦非  
草本草中木木中草也本高二三尺正二月舊枝抽  
苗作花有紫赤黃白四種紫赤者多白色者時有黃  
色者絳州所產也三月花落盡葉乃生葉似白前及  
柳葉而青漸加厚則轉黑矣根似桑三月采花五月  
采葉八九月采根有爭鬪者以葉按擦皮膚輒作赤  
腫和鹽擦卵則染外若赭色也修治取陳久者佳用

米醋煮十餘沸去醋水浸一宿晒乾則毒滅決明為之使反甘草

參曰芄諧元元首也山海經云首山多芄亦苗首出芄即隨之花落盡葉乃茁也形色氣味具火大虛中之體從內而外以張橫徧之用者也是主蠱毒鬼瘧疰瘕為陰凝之屬滿實在中致令氣短用失橫徧遂上逆而欬氣喉鳴喘及咽腫者對待治之若癰腫亦中氣不達不能橫徧肉理故也若殺蟲魚以功能徹

水則魚失所天矣故一名去水一名毒魚行水之功於此可見

本經下品

大黃氣味苦寒無毒主下瘀血血閉寒熱破癥瘕積聚留飲宿食蕩滌腸胃推陳致新通利水穀調中化食安和五臟

覈曰出河西山谷及隴西者為勝益州北部汶山西山者次之二月卷生黃赤放葉時四四相當宛似羊

蹄葉粗長而厚莖高三尺許味酸而脆頗堪啖也三月花黃五月實黑八月采根根形亦似羊蹄根大者如盃長二尺許切片陰乾理文如錦質色深紫修治切作薄片以文如穀紋緊厚者佳剉細蒸之從已至未取出晒乾又以臘水潤透蒸之從未至亥凡七遍晒乾更以淡蜜水拌蒸一伏時色如烏膏為度乃晒乾收用黃芩為之使

先人云大黃稱將軍將軍者所以行君令戡禍亂拓

土地者也味大苦氣大寒似得寒水正化而炎上作  
苦苦性走下不與炎上者反乎參同云五行相尅更  
為父母素問云承迺制制則生化是故五行之體以  
尅為用其潤下者正炎上之用乎則凡心用有所不  
行發生災難者舍同類之苦巽以入之不能彰其用  
矣蓋心主夏主熱火主神主血脈主病在五藏主心  
腹部位若腸胃之間心腹之分夏氣熱火之鬱神情  
血脈之結瘀閉宿留致成癥瘕積聚變生寒熱脹滿



者皆心用不行大黃能蕩滌之是謂推陳推陳者正所以行君之令闢土地安人民阜生物是謂致新致新者即所以調中化食安和五藏者也客曰開土地滌腸胃利水穀皆脾所司何為行火用也曰火有用而靈正當生土火無用而息正當瀉土顧其名自得之矣

參曰大黃稱將軍轉危為安亡為存故也具地體用大其用黃其體故其動也闢應地無疆含弘光大也

其為方也為大方為急方其為劑也為通劑為瀉劑  
積着留礙者極物之情通乎理而已

本經下品

蚤休氣味苦微寒有毒主驚癇搖頭弄舌熱氣在腹中  
穀曰出山陽川谷及宛句今河中河陽華鳳文州及  
江淮間亦有之生深山陰濕地即紫河車重樓金線  
七葉一枝花也一莖獨上莖當葉心似王孫鬼白芍  
藥萵麻輩葉凡一莖三層獨王屋山產者至五七層

每層七葉葉色碧綠夏月莖頭作花一花七瓣上有  
金絲下垂葉長三四寸秋結紅子根如鬼白及紫參  
蒼朮菖蒲等狀外紫中白理細質脆有稃糯兩種修  
治洗切焙用丹家采製三黃砂朮

參曰蚤休陽草也以生成功用詮名禮記云發揚蹈厲  
之已蚤使之休止休息爾一莖獨上莖當葉心葉必七  
花瓣亦七重臺或一或三或五或七正陽數之生火數  
之成也味苦氣寒生深山陰濕處是陽以陰為用矣對

待陰以陽用致熱在中若風自火出而弄舌搖頭及陽  
蹈陰中而癰陰越陽中而驚此皆陰陽舛錯越動靜之  
常故爾所謂發揚蹈厲之已蚤使之休止休息也

頭為諸陽之首舌乃心火之苗  
蓋動搖名風若風之自火出也

本經下品

鬼白氣味辛溫有毒主殺蠱毒鬼疰精物辟惡氣不祥  
逐邪解百毒

覆曰出九真山谷及宛句荊州峽州襄州近以錢唐

餘杭徑山者為上生深山巖石之陰即獨脚蓮唐婆  
鏡馬目毒公差天花八角盤也二三月挺生一莖中  
空獨上莖當葉心葉居莖上如初生荷葉邊出八角  
面青背紫叢生細毛揉之作爪李香旦則東向暮則  
西傾猶葵之衛足也花開葉下連綴莖間未嘗見日  
故曰羞天風來不動風去自揉能不為風力所轉矣  
其葉或二三層疊總一莖當心直上或旁生歧出必  
另貫葉心不與本莖相連絡也年生一莖莖枯根作

一曰新曰次年另生則舊曰中腐此陳新相易九年乃作九曰九曰者有神根形如蒼朮及黃精之歧曲以連生曰竅為別也辟穀伏汞畏垣衣

參曰獨莖八角獨根九曰陽以陰為體陰以陽為用也莖生葉心花蔽葉下陰陽互為根蒂也花如鈴鐸風來不動風去自搖見陰陽之體能立用能行也旦則東向暮則西傾與陰陽浮沉於升降也伏汞成丹辟穀不饑操陰陽造化之權衡也此盡陰陽造化之

變鬼物唯陰寧不斂掬許氏云望之斂掬曰白白音  
掬與掬同兩手曰掬與下畫相連之去聲者不同

本經下品

巴豆氣味辛溫有毒主傷寒溫瘧寒熱破癥瘕結聚堅  
積留飲痰癖大腹蕩練五臟六腑開通閉塞利水穀道  
去惡肉除鬼毒蠱疰邪物殺蟲魚

覆曰出巴郡川谷今嘉州眉州戎州皆有之木高一  
二丈葉如櫻桃而厚大初生青色久漸黃赤季冬漸

周仲春漸發仲夏舊葉落盡新葉齊生即開花成穗  
其色微黃五六月結實作房七八月成熟漸漸自落  
一房二瓣一瓣一子或三子子仍有殼獨戎州出者  
殼上有縱文隱起如線或一道或兩道三道土人呼  
為金線巴豆最為上品他處鮮有修治去殼敲碎每  
兩用麻油并酒各七合煮乾研膏用芫花為之使畏  
大黃黃連蘆笋菰笋藜蘆醬豉冷水得火良惡藁草  
與牽牛相反中其毒者冷水黃連大豆汁解之



參曰巴蛇名許氏云巴蛇吞象捷取巧嗜糜潰有形  
性之至毒者也謂巴且之蕩練藏腑開通閉塞毒烈  
之性相類爾故可對待陰凝至堅結聚留癖先人博  
議云蕩則齟齬不存練則瑕疵盡淨苟非陽氣消沮  
形如死灰者未免流毒不辜慎之

本經下品

大戟氣味苦寒有小毒主蠱毒十二水腹滿急痛積聚  
中風皮膚疼痛吐逆

覈曰出常山近道亦有多生平澤二三月抽芽紅色漸長叢高莖直中空折之有白漿葉狹長似柳梢頭葉攢密而上三四月開黃紫色花如杏及蕪荑根如苦參而細出淮甸者苗似百合而葉黃江南者葉似芍藥而苗短杭州一種色紫而柔為上品江南一種土大戟為下品北方一種縣大戟皮勒如縣而色白氣味峻利弱人誤服吐血修治勿用附生者誤服令人氣洩不禁即煎薺寧湯解之采得即於槐砧上細

劉與海芋葉拌蒸從已至申去芋葉晒乾用反甘草  
菖蒲能解之

先人云雙枝為戟所用為門我軍被敵咽喉之地疆  
界之域也出入生死莫不繇之其為用大矣蓋蠱毒  
唯入十二水唯不出風中欲入吐逆欲出四者之門  
能無樞要乎然人身樞要主心猶三軍之命在將大  
戟花苗色味悉屬心象誠急方之宣劑通劑上下表  
裏誰能不繇其門以為出入者今人唯知逐水尚可

擴充治痘澄飲以其咸從水類也客曰人身以九竅  
為門越人別立七衝為衝大戟惟堪下泄何有疆界  
門戶答曰九竅者身形之門戶七衝者六府之衝路  
如五藏十二經及骨空腠理亦莫不有疆界衝路門  
戶者經云八萬四千毛孔孔孔作大壑流非寓言也  
大戟苦寒行心之用於時為夏設人身有一毛孔於  
時不大便非靈活之身唯其莫不夏大乃成至大之  
用大戟張大夏令為門為衝則邪去有路自外自中

而汗而下矣且心之表氣為陽而苦寒又得太陽寒水之化故為心之用宣發太陽之開藥也以太陽經主開開處為衝為門可無惑矣

參曰大以用言戟者支兵也周禮掌舍棘門注云以戟為門主持開闔且禦侮也如治吐逆此但從開如治蠱毒十二水以及腹滿急痛積聚與中風皮膚疼痛此但從闔闔者持以開開者持以闔亦若拔戟以逐之以滅不格也



本草乘雅半偈卷六